

韓

門

綴

學

韓門綴學卷第二

史記孝景孝武兩帝紀

魏明帝曰司馬遷以受刑之故內懷隱切著史記非貶孝武令人切齒王肅對曰司馬遷記事不虛美不隱惡劉向楊雄服其有良史之才謂之實錄漢武帝聞其述史記取孝景與已本紀覽之大怒削而投之後遭李陵事遂下遷蠶室此爲隱切在孝武而不在於史遷史記此兩紀有錄無書今武帝紀後人所作也按遷之自敘雖云孝景本紀第十一今上本紀第十二而漢書司馬遷傳云十篇缺有錄無書則所缺固不止兩本紀也注引魏張晏字子博中山人曰遷沒之後亡景紀武紀禮書樂書兵書說律爲兵注云序目本無兵書張云亡失此說非也漢興以來將相年表日者列傳三王世家龜策列傳傳靳列傳元成之間褚先生補缺作武帝紀三王世家龜策日者傳言辭鄙陋非遷本意也宋劉攽字貢父新喻人曰史記文景事最畧班氏博采他書成之故於景帝世謂典客爲六鴻臚行

人爲大行卽武帝時官記景帝世事竊謂景武世近故遷有不及爲其報任安書固云草創未就適會此禍惜其不成及已被刑更欲著書以償前辱時遷爲中書令尊寵任職故任安責以古賢臣之義豈有武帝旣削其書而遷猶孜孜於著述耶王肅乃朗之子朗得論衡稱異而肅亦好舉異聞耳

### 魏其武安列傳

史記魏其武安侯列傳竇嬰引卮酒田蚡侍酒灌夫使酒而終以杯酒召禍酒乃其一篇之眼後人讀史無有指出之者

### 史傳酷吏列女

史傳酷吏示戒也傳列女示美也然若史漢之邳都權德輿酷吏傳議邳都

以道官無處父之難具申張之然所至之邦必以稱職聞其古之剛而無虐怒而中節者歟又曰子長殷首冠酷吏班氏又因而從之善善惡惡之義於此缺矣後漢書之董

宣魏書之酈道元北齊書之宋遊道其人皆君子也以酷吏斥之可乎至列女多有可議後漢蔡琰之文才也而身且三嫁隋蘭陵公主

之自誓也。而亦先嫁儀同王奉孝。大節虧矣。何論其他。房元齡妻盧。

妬婦耳。

梁公夫人至妬。見唐劉德廣唐嘉話。

新唐書特書其別目一事。可賤不可貴矣。婦言。

與婦德並重。如晉王渾妻鍾琰。王凝之妻謝道韞。千古艷稱。然觀新婦得配參軍一語。鍾夫人之禮安在耶。天壤乃有王郎之言。謝夫人之林下風安在耶。惟傳稱道韞遭孫恩之難。舉厝自若。既聞夫及諸子已爲賊所害。方命婢肩輿。抽刃出門。亂兵稍至。手殺數人。乃被虜。自爾婺居會稽。家中莫不嚴肅。然則謝夫人誠有不可及者。卽以兩人之言較之。鍾尤不成語也。晉尙清談。雖婦人亦放言若此。

### 魏延康晉元康

曹丕未受漢禪。先改元延康。旣受禪。又改元黃初。皆卽漢建安二十五年一歲中耳。此乃大書於三國志者。如晉惠帝。於武帝太熙元年四月卽位。卽改元永熙。次年正月改爲永平。晉書惠帝本紀。永平元年正月。有改永熙爲永平之詔。三月又書大赦改元。而不書改爲何。

號蓋元康也。乃自二年以至九年，其下卽接永康元年，遂若此九年  
中皆爲永平。是沒其元康之號，而永平乃不止於正月二月矣。楊駿  
傳云：駿闇於古義，動違舊典。武帝崩，未踰年而改元。議者以爲違春  
秋踰年書卽位之義。朝廷欲掩其失，令史沒之。明年正月，復改年焉。  
所謂史沒之者，沒永熙也。正月改者，改永平也。不知何以正月改而  
三月又改。凡散見於各志傳者，皆云元康，紀其實也。奈何晉所欲沒  
者，本紀載之，而晉所驟改者，本紀顧闕之耶。

### 漢晉春秋

桓溫覬覦非望，習鑿齒著漢晉春秋以裁正之。起漢光武終晉愍帝，  
於三國時，蜀以宗室爲止。至文帝平蜀，乃爲漢亡，而晉始興焉。世祖  
諱炎，炎興而禪受，可見天心不可以勢力強也。按三國以蜀爲正，朱  
子綱目本於習氏也。若司馬昭平蜀，昭固魏臣，安得使屬之晉。今三  
元命子編年，於漢後主炎興元年之次年，爲魏元帝咸熙元年，屬於

魏者祇此一年則以此一年非魏無可歸耳。晉書裴宏後漢臣其終曰魏封侯帝為山陽公明年劉備自立為天子

### 裴子野宋畧

宋元嘉中裴松之續修何承天宋史未成而卒曾孫子野常欲繼成先業及沈約撰宋書既行子野更撰為宋畧二十卷約見而嘆曰吾勿逮也。鄧氏函史謂沈書因於子野固謬。方氏釋疑謂裴畧乃刪沈約之書亦臆度耳。宋畧則李善文選注猶引之不知亡於何時而馬氏經籍考已無其目惜不得與荀袁兩漢紀並傳也。至梁書本傳謂子野自剋死期不過庚戌歲其年果卒南史乃作戊戌按戊戌是武帝天監十七年庚戌是武帝中大通二年相距十二年傳載普通七年王師北伐勅子野為檄論魏受詔立成普通在天監之後大通之前其七年當丙午歲則梁書作庚戌者是南史誤矣。

### 托跋二解

魏書序紀云昔黃帝有子二十五人或內列諸華或外分荒服冒意

少子受封北土國有大鮮卑山因以爲號其後世爲君長黃帝以土德王北俗謂土爲托謂后爲跋故以爲氏而南齊書魏虜傳云齊武帝永明時魏主宏改姓元氏初匈奴女名托跋妻李陵俗以母名爲姓甚諱之有言其是陵後者輒見殺至是乃改姓焉按此二說不同南僧北愛要皆無稽之談不足據也

### 可汗台吉

可汗之汗當音龕汗者君也主也可乃語辭此猶漢之稱單于也王莽時曾改曰單于程大昌北邊備對曰後魏之世蠕蠕杜倫始改稱單于爲可汗者其擬則皇帝也單于之稱元史猶有之可汗亦作黑韓宋史外國傳嘉祐八年于闐國遣使貢方物以其國主爲黑韓王黑與可音相近也猶之三韓之地所稱馬韓卞韓辰韓者韓卽汗以其爲三國之主耳汗亦作駢顧氏日知錄引書序駢貊曰駢卽韓也宋史回鶻傳初回鶻西奔族類散處故甘州有可汗王西州有克韓王復州有黑韓王皆其

後也是回鶻亦有三韓其實可克黑只一音作史者不知其義而分

之耳汗又作罕元史太祖本紀汪罕與烈祖相盟稱為按答華言交

友也後人或作詰達或作俺答烈祖崩後太祖尊汪罕為父汪罕稱太祖為太子汪

罕者克烈部脫里金封為王番稱王為汪罕蓋汪即王罕即汗合併

稱之耳其他稱號不一漢書西域傳烏孫國舅莫死岑陁代立岑陁

者官號也名軍須靡舅莫王號也名獵騎靡後書舅彌云師古曰舅

取舅莫彌取騎靡首有輕重耳魏書托跋氏謂土曰托謂后曰跋又

西域傳波斯國號王曰醫質才割反後周書宇文氏謂天曰宇謂君曰

文吐番之酋唐曰贊普宋曰錢逋沈存中筆談云青堂羌錢逋之子

唃廝囉錢逋者胡言贊普也唃廝華言佛也囉華言男也自稱佛男

猶中國之稱天子也唐裴庭裕東觀奏記大理卿馬曙瘞藏犀鉀為

奴所告貶邵州刺史諫官上論以奴訴郎主在法不赦上命杖殺曙

奴於青泥驛宋史忠節傳金人稱其主曰郎主宣武軍卒閻進從通



問使至雲中亡去追還留守高慶裔問曰郎主待汝有恩汝亡何故  
又外國傳元昊自號嵬名吾祖後遣使稱男邦泥定國兀卒兀卒卽  
吾祖也如可汗號文獻通考東女國王號賓就遼史漠北君王稱葛  
兒罕元史高昌之王曰亦都護又曰的斤見巴而木阿而忒的斤傳西域之王曰算  
灘郭寶馬八兒等國曰算彈史自注云華言國主也明史哈烈撒馬兒罕別失八  
里黑婁稱其王俱曰鎖魯檀猶言君長也又今外藩稱台吉相傳以  
爲太子之訛偶閱日知錄論足下二字之稱所引宋書西南夷傳諸  
國表文阿羅單國稱大吉天子足下闍婆婆達國稱宋國大王大吉  
天子足下梁書諸夷傳表文狼脩牙國稱大吉天子足下因思大吉  
卽台吉乃主君之謂所由來已久非卽太子之訛也

宋遼金元四史

宋遼金三史作於元元史作於明皆草率從事有同一事而紀志傳  
所書互異者有一事兩見重複無繁減之分者至於人名雖在兩史

宜當畫一。乃如遼史世表云：泥禮耶律儼。遼史作捏里。陳大任作雅

里。陳大任金人作遼禮。  
里。儀志遼史補志稱之。

蓋遼之始祖。顧安見其當作泥里耶。遼天祚帝紀

云：以楊割爲女直節度使。卽金之穆宗。其名盈歌。金史世表曰：南  
人稱楊割太師。又曰：楊割號仁祖。金代無號仁祖者。盈楊歌割。由南  
北音訛耳。乃宋之楊淑妃。稱章惠太后。見宋綏傳。而淑妃本傳不載  
其謚。元之文宗。名圖帖睦爾。而順帝至元五年詔內稱脫脫木兒。且  
此詔四百餘言。而文宗與順帝兩紀重書之。況文宗時固有萬戶脫  
脫木兒知樞密院事。及荆王子脫脫木兒。奈何帝后之名號。在一史  
中猶互異。此不但如歸田錄所載契丹阿保機之名。有布機。梁學士李  
琪金門集保護趙志之傳聞不同矣。惟金史習不失傳云：本作辭不失。後定爲  
習不失。石土門傳云：漢字一作神徒門。習古廼傳云：亦書作寶古廼。  
宗望傳云：幹魯補。又作幹离不。宗弼傳云：幹𪔐。又作兀朮。亦作幹出。  
或作晃斡出。紇石烈牙吾塔傳云：塔亦作太。亦曰牙忽帶。粘沒喝。漢

語訛爲粘罕字以音訛固不嫌於詳盡凡史傳於七八字之名雖屢見必全書之與一二字之名無異此義後人不知矣遼史每稱耶律儼儼乃李仲禧之子自遼道宗大康中耶律孟簡請修國史乃命置局至壽隆中儼上皇朝實錄七十卷至金熙宗章宗時又兩修遼史一成於皇統八年一成於泰和七年金史蕭永祺傳云耶律固作遼史未成永祺繼之作紀三十卷志五卷傳四十卷上之又党懷英傳云大定二十九年與郝俛充遼史刊修官移刺益趙渢等七人爲編修官凡民間遼時碑銘墓誌及諸家文集或記憶遼舊事悉上送官泰和元年增遼史編修官三員詔分紀志列傳刊修官有改除者以書自隨懷英致仕後章宗詔直學士陳大任繼成遼史云元初滅金萬戶張柔入史館取金國實錄輦致其家柔將致仕乃上之元命王鶚修遼金二史在宋未亡之前金史衛紹王紀贊云中統三年承旨王鶚有志論著求大安崇慶事不可得采摭各條藏在史館未有成

書逮脫脫等修三史則金史所本者劉祁之歸潛志元好問之壬辰雜編皆私史也以今觀之遼史志優於傳金史傳勝於志而紀表則皆無可取志之蕪雜不獨金史若宋之禮志二十八卷食貨志上六卷下八卷何異戶禮兩部之檔案宗室世系二十七卷一趙氏宗譜耳宋史曾不及遼金之猶有準節也元史草草如刑法志直是胥鈔元律而已至於史志經籍藝文所以杜後世之偽書邪說故多詳於古而畧於今此非胸羅載籍者不能作其本朝人著作不必盡傳故可以從畧此惟隋修五代史志爲最善雖已亡之書亦載其目而明注之曰亡逮舊唐書又混載之則已非矣唐書及通考亡者闕之猶是傳疑之意元史非遼金可比乃竟不志藝文應由成書迫促其前自太祖迄寧宗十三朝之事自二月至八月而書成其後順帝時事自二月至七月而書成古史從無此速亦從無此例史臣宋濂王禕等作記於目錄之後自謂文詞過陋抑猶自知之明勝於史臣之自

信者矣

### 三史姓氏

元魏安帝時諸部有九十九姓。獻文帝七分國人乃分其氏以紇骨拓拔等氏改爲胡周長孫奚伊邱亥等七族。又益以叔孫車氏與帝室爲十姓。百世不通婚。孝文帝太和十九年詔內有穆陸賀劉樓于嵇尉八姓且別姓與族。太和二十年帝室改姓爲元。具詳魏書官氏志。凡魏書列傳所載諸代人皆其改姓也。遼金元史於人姓名字少者合姓名以書之。字多者則書名。而後以姓書於下。後人不求其故或摘取其名之第一字爲姓。如稱唐兀余闕爲余忠宣公。余闕二名相連又訛余作余益謬矣。考遼史后妃傳云太祖慕漢高帝故耶律儼稱劉氏。儼所撰遼史其書法如此以乙室拔里氏比蕭相國遂爲蕭氏。外戚表云大同元年太宗自汴將還留外戚小漢爲汴州節度使賜姓名曰蕭翰以從中國之族。由是拔里乙室已述律太祖后述律氏開國爲述律氏之後三族皆爲蕭姓。

是則遼有漢之劉蕭二姓矣。國語解云：有謂始興之地曰世里，譯者以世里爲耶律。又有言以漢字書者曰耶律蕭，以契丹字書者曰移刺石抹。考遼之列傳，凡二百六十人，莫多於耶律蕭兩姓。蕭自后妃外，有傳者六十三人，兼備三族。耶律自宗室外，有傳者一百二十人。太祖世里氏與大賀遙輦號二耶律，分之亦有三矣。顧皆稱耶律，無稱劉者。若劉六符，河間人；劉仲，宛平人；劉輝，文學傳不詳何處人，皆非宗室也。亦有非同姓而得賜國姓者，王繼忠、陳昭衮、韓德、讓、李仲禧、王觀、楊興功、張孝傑，俱賜姓耶律。或并賜名，且有劉霖，與仲禧同賜姓，則劉非國姓可見矣。道宗咸雍十年，耶律庶箴以姓氏止分二耶律與蕭，請推廣之。諸部各立姓氏，不聽。金史國語解敘曰：國姓爲某，漢姓爲某。後魏孝文以來已有之。按魏之改姓，始自顯祖獻文帝，非始自高祖孝文帝。姓改而傳中如叱列、郁久閭、乙速孤等，其爲本姓者寥寥矣。金熙宗時，太師勗撰定女直郡望姓氏譜，其書未行。考宗室表云：完顏十

二部其後皆以部爲氏稱完顏者有二有同姓完顏蓋疎族若石土門廸古乃是也有異姓完顏蓋部人若歡都是也雖宣宗詔宗室皆書姓氏而雜以部人亦仍無辨後來乃有非部人而得賜姓者如郭藥師郭仲元郭阿隣董才汪三郎主狗兒李霆梁佐李黻住張甫張進張開國用安本名安乃賜姓時乃改用安移刺衆家奴耶律慎思及子元宜皆是但古之賜姓若漢劉氏魏曹氏吳孫氏隋楊氏唐李氏宋趙氏但云賜姓而已而金則所賜有總麻以上大功以上及賜止其家之別海陵卽位詔賜諸姓者皆復本姓見郭藥師傳是但行於海陵之世而後此之賜姓正多也更有賜以他姓者如包長壽包世顯包疙疸皆賜姓烏古論氏李辛賜姓溫撒氏張資祿賜姓女奚烈氏楊沃衍賜姓兀林答氏郭祿大賜姓顏蓋氏又東永昌爲溫敦氏宣宗后王亦爲溫敦氏觀令孤爲和速嘉氏何定爲必蘭氏馬福德馬栢壽爲夾谷氏雖不及完顏之尊而入於貴族亦以親之也且有再賜者程琢賜

姓夾谷氏。詔更賜完顏氏。附見完顏伯嘉傳中。當時更有以國姓譯爲漢姓者。國語解所載。始於完顏。終於古里命。凡三十一姓。如完顏漢姓曰王。至今其子孫有兄弟而一稱完顏。一稱王者。猶沿舊制。古里命漢姓曰汪。國語於古里命無解。不知其義。諸姓惟字末音同。乃三字中取其一字。而移刺曰劉。石抹曰蕭。自道已然耳。但雖有譯姓。仍是禁稱。世宗大定十三年。禁女直人毋得譯爲漢姓。二十七年。又禁改稱漢姓。章宗明昌二年。泰和七年。亦俱有禁。是以古里命石倫。隆安人古里命蒲察。見文獻通考不云姓汪。此其與元魏之制不相同也。元如馬祖常之高祖錫里吉思。爲金鳳翔兵馬判官。子孫因官以馬爲氏。布魯海牙。拜廉使。日生子。因名其子廉希憲。遂姓廉氏。此皆以祖父之官爲姓也。唐仁祖之祖曰唐古直。子孫因以唐爲姓。小雲石海涯之父曰貫只哥。遂以貫爲氏。稱貫酸齋。此皆以祖父之名爲姓也。烏古孫澤其先女直烏古部。因以爲氏。此以部落爲姓也。夾谷之裔。



其先女直加古部音訛爲夾谷趙若弼本姓木要命音訛爲趙家遂姓趙此又以傳訛而得姓也三史人名多有雷同遼之蕭韓家奴有二一爲奚長渤海魯恩之後封蘭陵王一爲涅刺部人官節度使入文學傳又耶律宏吉有二一爲遙輦鮮質可汗之後封公官侍中一爲化哥之弟遷南院大王加于越官又耶律撻不也有二一爲孟父房仁先之子官招討使一爲季父房高家之子官宣徽使金之阿魯有三一始祖子宗賢一太祖子宗強一太宗子宗本又神土邁有二一太宗子充一太宗時宗室胡速魯改之子又阿魯補有二一系出景祖治訶之子一太祖子宗敏凡皆內族而雷同莫辨其若婁室阿隣胡刺胡里補塔不也六斤七斤之以姓別者尤不勝舉也元之伯顏有五兩宰相一蒙古八隣部人一蔑兒吉觸氏一儒學乃蒙古哈刺魯氏居濮陽一苗軍帥楊完者之弟爲張士誠所圍自殺一賀仁傑之子勝小字伯顏以小字行後被誣見殺又脫脫有四一功臣木

華黎之後撒蠻之子。札刺兒氏也。一牙牙之子。康里脫脫。康里漢高車國。當與烏古相同。一馬札兒台之子。伯顏之弟。亦蔑兒吉。解氏也。一大陽可汗之子。高昌人。又兩。察罕。一唐兀烏密氏。都元帥。追封河南王。一西域人。拜中書進平章政事。又兩。拜住。一安童之孫。英宗時死難。一康里海藍伯之裔。明兵至。死節。又兩。和尚。一玉耳別里伯牙吾台氏。一蒙古乃蠻台氏。又兩。蠻子。皆爲修史提調官。一參議中書省事。一左司郎中。或以譯無定字。同名者。不妨易換同音之字。如遼之耶律撻不也。與耶律塔不也。元之阿里海牙。與阿禮海牙。太不花。與泰不花。斯顯然矣。然元史中。如伯顏亦作栢顏也。先亦作埜先。帖木兒亦作鐵。亦作穆與睦。爾與邇。名同者太多。勢難盡變。特不應一人而兩書耳。至於時有後先。苟在並時。毋令淆惑。若金有兩。婆盧火。皆太宗時宗室。因以在後者附前傳。又有兩。訛可。一曰草火訛可。一曰板子訛可。皆內族之護衛出身。又同守河中。因合爲一傳。又有二。

婁室皆完顏氏曰大婁室中婁室小婁室以長幼別之而合爲一傳  
兩蒲察六斤一與謀逆一守東華門不肯從亂並見胡沙虎傳分其  
所分合其所合金史創其例似可爲法也

一人兩史

自地分南北于是史書有一人分傳兩史者宋文帝第九子義陽王  
昶廢帝時奔魏及明帝卽位以千金贖昶於魏不獲魏封昶丹陽王  
三尙公主加封宋王卒謚曰明齊明帝第六子建安王蕭寶寅梁克  
建業奔魏魏世宗封丹陽郡公齊王尙主復封梁郡公齊王以反賜  
死齊東昏侯吳淑妃幸於梁高祖七月生子名綜封豫章王奔魏改  
名贊封丹陽王尙主後爲沙門卒孝靜帝元象初即梁武帝大同五年吳人盜其  
喪還江東梁武猶以爲子附葬蕭氏墓此皆自南奔北皆帝王子皆  
有丹陽封號於魏者也宋遼金之時王繼忠仕宋爲鄆州刺史殿前  
都虞侯宋史云爲高陽關節度使徙定州仕遼爲樞密史封楚王更其姓名爲耶律顯忠

又改名宗信。太平三年致仕卒。

宋史云後不知所終

其通南北之和猶不忘宋也。

張邦昌劉豫金史俱在列傳。金冊邦昌大楚皇帝。冊豫大齊皇帝。宋

高宗卽位封邦昌同安郡王。後賜死。豫僭號凡八年。廢爲蜀王。封曹

王。死於金皇統三年。宋史俱入叛臣傳。又張覺

亦作慤

郭藥師皆遼之

臣。分載宋金兩史。覺在金史叛臣傳。藥師在金。賜姓完顏。史贊以爲

遼之餘孽。宋之厲階。金之功臣也。宋史俱入姦臣傳。又李全李壇父

詳宋史。子詳元史。俱入叛臣傳。此亦皆白南奔北。皆二心之臣也。若

宇文虛中王倫宋史金史亦俱有傳。史論皆以虛中之死爲自取。然

觀施德操北窓炙輿稱其在金作三詩。有云。人生一死渾閒事。裂眦

穿胸不汝忘。其仕金爲國師。令南北講和。大母獲歸。皆其力也。紹興

十五年。

乃十四年方知

謀挾淵聖以歸。前五日爲人告變。虛中覺有警。

急發兵。直至金主帳下。金主幾不能脫。爲所擒。其說如此。而兩史皆

謂以謗訕獲罪。果爾何至老幼百口同時共死耶。淳熙初。贈開府儀

同三司謚肅愍。賜廟仁勇。開禧中。賜姓趙氏。王倫事宋史云。紹興十四年。金欲以倫爲平灤三路都轉運使。遣使來趣。倫拒益力。金杖其使。俾縊殺之。倫厚賂使。少緩。遂冠帶南嚮。再拜慟哭。就死。人皆哀之。子述與從兄遵。間入金境。得倫骨以歸。官給葬事。謚愍節。金史則云。皇統四年。以倫爲平州路轉運使。倫已受命。復辭。遜上曰。此反覆之人也。殺之上京。其賂使及歸骨事。俱不載。兩史皆脫脫所修。而拒命受命所言不同。何以取信後世耶。至如一史之中。有一人兩傳者。舊唐書之楊朝晟。元史之速不台。雪不台。完者都。完者拔都。已著於日知錄。而史傳又有誤兩爲一者。五代史。拓拔思恭。思敬兄弟也。誤作一人。見於陳後山叢談。恐元史亦未必無此類也。前史晉宋以來。南北分據。元魏不入晉史。而南以北爲索虜。北以南爲島夷。彼此互視爲外國。蓋諸書作非一人。成非一時。故云爾。宋舊史有女直傳。而脫脫等刪之。則以三史皆領自阿魯圖。別兒怯不花。皆脫脫爲都總裁。

也。

### 同名

凡人名字與古同者皆有所慕尚也。乃有以已之名與人以人之字歸已者。吳顧雅以蔡邕嘗避怨於吳雅從學琴書專一清靜敏而易教邕異之謂曰卿必成教今以吾名與卿故雅與伯喈同名字元嘆言爲伯喈所嘆賞也。晉韓延之乃劉裕故吏裕征譙王文思密與延之書延之報書耻之以裕父翹字顯宗延之於是字顯宗名子曰翹示不臣劉氏也。五代宋王彧字景文美風姿善言理太祖甚相欽重爲太祖娶景文妹而以景文之名名太宗。宋諸太宗明皇帝諱或太祖文皇帝第十一子以上三事奇絕矣。遼史以的魯子徒离骨嗣爲夷离堇仍以父字爲名以旌其忠。宋書海南林邑國王陽邁夷人謂金之精者爲陽邁故以爲名。後其子復曰陽邁是又子襲父名也。北史序傳李倩之死趙郡李榮來弔之嘆曰此家風範海內所稱今始見之真吾師也欲與連類卽日

自名勞之。此幾同後世之連宗矣。元史烈祖攻塔塔兒部，獲其部長鉄木真。太后月倫適生太祖，手握凝血如赤石。烈祖異之，因以鉄木真名之。既喜其異稟，而乃名以所獲部長之名。何歟？至如陳蔡景歷妻兄名劉裕，隋梁士彥子名操，字孟德，較之瞽字伯明，不尤異耶？宋党進名進，自稱曰暉，人問之，則曰：「從吾便耳。」妙哉。

脫卜赤顏

卜亦作必

元史稱太祖深沈有大畧，用兵如神，故能滅國四十，遂平西夏。其奇勲偉跡甚衆。當時史官不備，多失於紀載。云：按太祖平北狄諸國，則本紀有之；憲宗時續平西域諸國，則郭寶玉之孫郭侃傳有之；又元劉郁西使記作於世祖中統四年，具載諸國山川風土。今西北四十人家皆爲元裔，則元太祖世祖之勲蹟洵奇偉矣。但考察罕傳、仁宗命譯脫必赤顏名曰聖武、開天紀及紀年纂要、平金始末等書，俱付史館。文宗本紀至順二年，奎章閣纂修經世大典，請從翰林國史院

取脫卜赤顏一書紀太祖以來事蹟翰林學士承旨押不花等言脫卜赤顏事關秘禁非可令外人傳寫臣等不敢奉詔從之然則脫卜赤顏雖史館有之乃是譯本故奎章閣復有請耶其後撒迪請備錄皇上因讓大凡往來奏答與訓勅辭命及燕鐵木兒等宣力效忠之蹟續爲蒙古脫卜赤顏置之奎章閣從之同一脫卜赤顏也太祖之勲烈以奎章閣無書而不傳文宗之不軌以奎章閣有書而傳矣

錢方二氏注離騷

桐城錢飲光撰屈詒一卷曰篇中稱芳不一扈芷紉蘭獨行之芳也。寒木蘭攬宿莽所共事之芳也。滋九畹樹百晦所培植之芳也。原之芳既委弃衆芳亦蕪穢而原惜芳不已飲其墜露餐其落英從而結之貫之矯之紉之而惡原者益以此重原之罪其曰既替予以蕙纊兮又申之以攬茝是也彼黨人謂幽蘭不可佩謂申椒其不芳好惡相反固無足怪獨是時俗變易椒蘭不能自立而皆化爲惡草原初



紉蘭爲佩以爲其臭味也。迨折瓊枝以繼之。復有取於玉焉。玉能入火而質不變。自衆芳委厥美以歷茲。原惟瓊佩之是貴。蓋從此絕口。不及蘭蕙矣。以至裊羞皆取諸瓊靡。而英亦不餐。芳潔之性。卽其篇章一字不苟如此。其後方望溪先生亦桐城人也。著離騷正義一卷。於啟九辯與九歌分以下二十四句。注曰。歷舉夏殷後王之失道。而不及周之幽厲。古人無一言而不度於禮如此。於余以蘭爲可恃。今以下八句。注曰。於蘭曰無實。曰委厥美於椒。則直指其專佞慢怕。蓋其惡有淺深。而責之亦有輕重也。於朝發軔于天津兮以下十六句。注曰。崑崙曰西極。曰流沙。曰赤水。曰西皇。曰不周。曰西海。皆以西爲言何也。原旣反覆審處。知濁世不可以終變。舊鄉不可以久留。而決意遠逝以自疎。蓋日暮途窮。將從彭咸之所居矣。日落西山。萬物歸暝。故託言出遊於此。九章指蟠冢之西隈。與纁黃而爲期。亦此意也。其將進而有爲。則以遊春宮爲比。東方物所始生也。或疑其有意。

於仇警之秦廷過矣。按此皆絕特之見。至於何瓊佩之偃蹇兮四句。注云。前此皆以香草爲佩。而此曰瓊佩者。艱危備歷而堅貞不改。可以比德于玉。又承上折瓊枝以繼佩。及琨美而爲言也。此條所見畧同。錢乃先生之大父行。先生未冠時。猶及見之。

### 孔廟設像

孔子廟設像。朱子曰。鹿禮殿塑像說。指其非理。但設像自古有之。有石像。有畫像。有塑像。華陽國志。文翁爲蜀郡守。造講堂。作石室一名玉堂。安帝永初間。烈火爲災。堂及寺舍並皆焚燎。惟石室獨存。至獻帝興平元年。太守高朕於玉堂東復造一石室。爲周公禮殿。全蜀藝文志載李石石室詩。注云。漢孝景時。文翁始作石室。西爲文翁祠。南爲高朕。北文翁石室。差大。皆有石像。石室說孔子生像其生於陳向後屈膝當前七十二弟子侍於兩旁宋黃休復益州名畫錄云。高朕周公禮殿。其壁上圖畫上古盤古。李老等神。及歷代帝王之像。梁上又畫仲尼七十二弟子。三皇以來名臣耆舊。

云西晉大康中益州刺史張收筆古有益州學堂圖今已別重裝無舊迹矣齊永明十年成都刺史劉悛再修玉堂禮殿悛弟瑱畫仲尼四科十哲像并車服禮器今已重塑別畫無舊蹤矣宋蔡條鐵圍山叢談云徽宗宣和後若岐陽宣王之石鼓西蜀文翁禮殿之繪像凡所知名罔聞巨細遠近悉索入九禁按此繪像已非高昉所作而靖康之亂遂不可問若石像至南宋猶存紹興中王剛中知成都府府學禮殿東漢興平中建後又建新學遭時多故日就傾圯屬九縣繕完悉復其舊朱子嘗屬蜀帥幕府楊方子直蜀漕楊玉休子美放寫先聖先賢之像至今傳有文翁禮殿圖惜亦不可得見矣嘗考西京後他書所載設象有可歷數者漢光武建武二年壽光縣城西南石室有孔子象金鄉山司隸校尉魯君冢前有石祠石廟四壁皆青石隱起刻書契以來忠臣孝子烈婦孔子及七十二弟子形象象邊皆刻石記之載在水經注又桓帝立老子廟於苦縣賴鄉畫孔子象於

壁。靈帝光和元年，置鴻都門學，畫孔子及七十二弟子象。此漢象也。水經注謂魏黃初二年，文帝令郡國修孔子廟，有象。弟子執卷立侍。疑魏晉以後塑像，實始於此。梁元帝本紀，帝自圖宣尼象，爲之贊而書之。時人謂之二絕。魏書李平傳，平行相州事，尋正刺史，修飾太學，圖孔子及七十二子於堂，親爲立讚。又劉道斌傳，道斌爲恒農太守，修立學館，建孔子廟堂，圖畫形像。去郡之後，民故追思之，乃復畫道斌形於孔子像之西，而拜謁焉。北齊釋奠之禮，張憑建議，中有學堂，舊有聖賢象之語。後周以大皇寺一作江寧寺壁有畫盧舍那佛及孔子七十二弟子象，因得不燬。此魏晉以來象也。舊唐書禮樂志，開元八年，以司業李元瓘奏，敕改顏子等十哲爲坐像，曾子塑像，坐於十哲之次。圖畫七十子及二十二賢於廟壁，循吏傳，韋機爲檀州刺史，以邊州素無學校，創立孔子廟，圖七十二子及自古賢達皆爲之贊。韓文公處州孔子廟碑，刺史鄴侯李繁到官，新作孔子廟，又令工改爲

顏子至子夏十人象其餘六十子及後大儒數十人皆圖之壁此唐象也後唐明宗長興二年以國子博士蔡同文奏春秋釋奠於文宣王顏子配坐閔子騫等十哲排祭奠其有七十二賢圖形於四壁此五代象也宋太祖建隆元年增修國子監學舍塑先聖亞聖十哲象畫七十二賢及先儒二十一人於東西廊之木壁徽宗崇寧四年詔國子監神象用冕十二旒服九章又圖繪頒之天下郡邑此宋象也明史槩云天順間林鶚爲蘇州知府先聖像剝落鶚曰塑像非古也昔太祖於國學用木主命改從之或以毀聖像爲疑鶚曰此豈真聖像耶古人席地而坐正不如此此明象也他如隸續載孔子見老子畫象侍孔子者一人車上一人益州名畫錄載常棊有孔子西周問禮象往往錯見於記錄之書自明嘉靖九年學宮易象爲木主宋文恪訥國子監碑日知錄引之蓋明太祖雖定其制至嘉靖而始行乃今曲阜孔林猶有大塑象又孔氏有畫本傳是子貢所畫晉顧凱之

重摹其信然耶。若唐吳道子畫先聖立象行象及七十二弟子象。杭州府學有石刻。南宋大學之遺也。

四配 教聖追封

魏正始時祀孔子以顏淵配。北齊釋奠亦以顏配而有拜孔揖顏之禮。其晉宋梁陳及隋皆以孔爲先聖。顏爲先師。唐貞觀定議以孔子爲先聖。以顏回配。高宗總章元年以顏曾並配。享孔子廟。疑未舉行。故明皇開元時特塑曾子像坐於十哲之次。宋真宗大中祥符元年幸孔林追謚曰元聖文宣王。追封叔梁紇爲齊國公。顏氏魯國夫人伯魚母并音堅官氏鄒國夫人。封充公。顏回爲充國公。五年以國諱改謚孔子至聖文宣王。神宗元豐六年封孟子爲鄒國公。七年以孟子配食文宣王。哲宗卽位詔顏子孟子配享孔子廟。廷徽宗大觀二年躋子思從祀。是始在從祀之列而已。度宗咸淳三年行釋菜禮封曾參鄒國公。孔伋沂國公。與充國公顏回鄒國公孟軻同配享。升于張此十哲

聖廟四配之始也。其序充邸沂鄒居正位之東面西向爲配位。十哲居殿上東西向爲從祀。元文宗至順元年加封孔子父齊國公爲啟聖王。母魯國太夫人爲啟聖王夫人。封顏子充國復聖公。曾子郈國宗聖公。子思沂國述聖公。孟子鄒國亞聖公。此四配稱聖之始也。唐宋俱以亞聖稱顏子。元以亞聖稱孟子。蓋本趙氏岐孟子題詞所謂命世亞聖之大才者也。宋史書名。元史則稱子明。嘉靖九年定議孔子神位。題至聖先師孔子。去其王號。及大成文宣之稱。其四配稱復聖顏子。宗聖曾子。述聖子思子。亞聖孟子。十哲以下及門弟子皆稱先賢某子。凡學別立一祠中。叔梁紇題啟聖公孔氏神位。以顏無繇曾點孔鯉孟孫氏配。俱稱先賢某氏。

### 文廟樂章

文廟樂章至隋始可考。隋祭先聖先師奏誠夏辭四言一曲耳。唐釋奠樂章有八。文宣王廟奏宣和之舞。顯慶三年國子博士范穎等所

撰舊唐書載皇太子釋奠五章迎神用承和亦曰宣和皇太子行用承和奠幣用肅和迎俎用雍和文舞用舒和武舞用凱安詞同冬至圓邱送神詞同迎神內惟皇太子行及文舞乃七言四句餘皆四言八句又載享孔廟樂辭二章皆四言八句豈卽顏等所撰耶宋代樂章無不四言八句

惟數吹曲乃是填詞

不獨文宣王廟爲然景祐祭文宣王廟迎

神曰凝安初獻升降曰同安奠幣曰明安酌獻曰成安飲福曰綏安送神曰凝安大觀三年釋奠辭亦六首有配位酌獻亦用成安而無飲福綏安紹興時釋奠文宣王迎神用凝安凡四首則以黃鍾爲宮大呂爲角太簇爲徵應鍾爲羽而分也初奠盥洗用同安陞殿亦用同安奠幣用明安捧俎用豐安文宣王位酌獻用成安兗國鄒國酌獻俱成安亞終獻用文安徹豆用娛安送神用凝安合共十四首金史禮志宣聖廟釋奠迎神三奏來寧之曲初獻盥洗曰靜寧升階曰肅寧奠幣曰和寧降階曰安寧兗國公酌獻曰輯寧鄒國公酌獻曰



泰寧亞終獻曰咸寧送神亦來寧凡四言八句者九章惟升階用南  
呂宮餘皆姑洗宮元成宗大德九年命撰宣聖廟樂章而釋奠所用  
仍用宋辭惟增卹國沂國爲十六章而自迎神以下十四章惟詳盥  
洗同安姑洗宮升殿同安奠幣明安俱南呂宮捧俎豐安姑洗宮酌  
獻成安俱南呂宮亞獻文安姑洗宮飲福與盥洗同亦同安姑洗宮  
也飲福惟釋奠親視用之攝事則不用并路州縣並皆用之徹豆娛  
安南呂宮送神擬安黃鍾宮望瘞亦與盥洗同其辭則皆宋大晟府  
撰擬之辭已載宋史樂志而元禮樂志何復重錄之耶新樂章迎神  
曰文明盥洗曰昭明升殿曰景明奠幣曰德明文宣王及充國鄒國  
酌獻俱曰誠明而卹國沂國之辭闕焉蓋以曾子子思列爲四配始  
自宋度宗咸淳三年則或自咸淳時所撰然宋史何以不載後此十  
年而宋亡咸淳之辭必已散失而元爲補之及後新制以此二章先  
已補撰不復更作非闕也亞獻曰靈明送神曰慶明凡九章合卹沂

爲十一章然終元之世未及用雖仁宗延祐五年命各路府宣聖廟  
置雅樂選擇習古樂師教肄生徒所肄習亦俱舊章耳明史洪武六  
年定祀先師孔子樂章迎神曰咸和奠帛曰寧和初獻曰安和亞終  
獻曰景和徹饌送神曰咸和六章皆四言八句我朝所定文廟樂章  
其咸寧安景之字同於前而和改爲平去奠帛而分初亞終獻爲三  
迎神曰咸平初獻曰寧平亞獻曰安平終獻曰景平徹饌與送神俱  
咸平凡四言八句者六章至於春秋之祭樂章雖同音律各異春祭  
夾鍾爲宮倍應鍾起調秋祭南呂爲宮仲呂起調如迎神首句云大  
哉孔子春則尺凡六五秋則六凡上尺其他句亦春秋不同者多皆  
傳自曲阜而肄習之蓋用陰律不用陽律夾鍾二月南呂八月而亥  
與卯巳與酉所謂會局也今天下郡縣之學或僅傳其辭而不知其  
音之節與舞之容或能知初亞終三獻之聲容而迎神與徹饌送神  
皆有歌而無舞金史章宗賜衍聖公登歌樂一部仍遣太常舊工往

教孔氏子弟以備祭禮元史虞集為國子助教大成殿新賜登歌樂其師世居江南樂生皆河北田里之人情性不相能集親教之然後成曲復請設司樂一人掌之以俟考正嗚呼孰謂今無其人哉

闕里世系 衍聖公 王經博士

孔子之後宋史有孔宜傳金史有孔璠傳明史有孔希學孔彥繩傳

惟元史於孔氏無傳故世系未詳宋孔宜傳所載伯魚子思後第三

世白子四世永子魚名鮒五世箕子魚名鮒六世穿子魚名鮒七世謙子魚名鮒八世鮒子魚名鮒

九世騰子魚名鮒十世正子魚名鮒十一世武子魚名鮒十二世延子魚名鮒

年子魚名鮒十三世霸子魚名鮒十四世福子魚名鮒十五世房子魚名鮒

十六世均子魚名鮒十七世志子魚名鮒十八世損子魚名鮒

十九世曜子魚名鮒二十世完子魚名鮒二十一世羨子魚名鮒二十二世震子魚名鮒

二十三世疑子魚名鮒二十四世撫子魚名鮒二十五世懿子魚名鮒二十六世鮮子魚名鮒

二十七世乘子魚名鮒二十八世靈珍子魚名鮒二十九世文泰子魚名鮒三十世渠子魚名鮒

改封恭聖侯後 三十一世長孫齊封公 三十二世嗣哲改封紹聖侯 三十三世德倫

齊封侯 三十四世崇基襲侯 三十五世璉之封文宣公 三十六世萱 三十七世

齊卿 三十八世惟睦 三十九世策以上俱襲文宣公 四十世振刑部員外郎 四十一世

昭儉兖州司馬 四十二世光嗣泗水主簿 四十三世仁玉後唐襲文宣公 四十四

世宜宋太宗封文宣公 四十五世延世真宗時世 四十六世聖祐改名佑 公知仙源

縣 宋史孔宜傳中載至天禧五年而止 又考宋史本紀禮志及文獻

通考四十七世宗愿仁宗時襲文宣公後以祖無擇言不當以祖誥加於封爵 四十八

世若蒙神宗時襲封若蒙為沂州新泰主簿時改行聖公為奉聖公 若虛哲宗元祐初朝議大夫孔宗翰請襲封者無兼他

其後孔宗壽等舉 四十九世端友徽宗時襲封 玠高宗時襲封行聖公瑞友 五十世指

高宗 五十一世文遠光宗時襲文遠 五十二世萬春 五十三世洙真宗

世金史本紀及孔璠傳五十世璠端友弟端操之子字文老係齊衛襲行聖公 五

十一世拯元總元會金世宗時承卒 五十二世元指夢得金章宗時襲後世襲

山東冠縣縣用於朝也及哀 元指元太宗兵入南京以孔元指襲封行聖公傳稱元指歷事宣宗

宗東行 元指宗東宗歸於大元終焉不云元復襲封則元指必另是一人 元

史世祖至元十三年以孔子五十三世孫曲阜縣尹孔治兼權主祀

事十九年襲封衍聖公孔洙入覲以爲國子祭酒兼提舉浙東道學

校事就給俸祿與護持林廟璽書仁宗延祐元年敕中書省定議孔

子五十三代孫當襲封者以名聞此距至元壬午又三十年應是五

十四代史訛四作三也順帝至元六年以孔克堅襲封衍聖公十五

年以克堅同知太常禮儀院事以克堅子希學爲襲封衍聖公又訪

之孔庭所記謂聖祐無子以叔延澤之子宗愿襲爵四十七世若蒙

若虛若蒙生事廢以弟若虛襲四十八世端友若蒙之子四十九世璠五十世拯五十一

世元楷五十二世之厚五十三世浣五十四世思晦則元楷乃拯之

子而之厚浣思晦皆元楷之後入明史矣明史分北宗南宗北謂曲

阜五十四世師晦字明道當卽元仁宗所定訛者文宗時以五十五世克堅字聖大

時加賜五十六世希學字士行明太祖進秩二品五十七世訥字伯五十八世公鑑

從二品五十九世彥綰字子承慶六十一世宏緒字敬宏泰宏緒於成化時襲卽以

文以孫宏緒嗣宏泰弟宏泰後仍歸宏緒

子間六十二世聞韶知德六十三世貞幹綱六十四世尙賢字參之

六十五世蔭植字對賢是崇正時矣南謂衢州西安

自端友隨宋南渡家衢州五傳至洙元至元間命歸曲阜襲封洙讓

爵曲阜之弟治讓爵事宋元史不載至明宏治十八年洙六世孫彥繩朝以衢州

知府沈杰奏請授官正德元年授五經博士乃五十九世也六十世

承美實六十一世宏章以六十二世聞音知政六十三世貞運用皆襲

博士是萬歷末矣五經博士之官自漢武帝建元五年春始置五經

博士東漢祭遵建為孔子立後奏置五經大夫皆以五經為名明乃

遽授顏曾思孟仲周二程張邵朱之五經博士其奉子思祀者以衍

聖公之弟為之故孔有曲阜西安兩博士

縣學

漢制郡國曰學邑侯國曰校史所載立學者西漢之文翁東漢之李

忠寇恂任延秦彭鮑德皆太守也縣獨有辰陽長宋均沿及魏晉但

問郡學而縣學無述焉。隋文帝雖有廢州縣學之詔，所謂縣學無可考。大概倚郭之縣卽是府耳。唐高祖武德七年，詔諸州縣及鄉並令置學，而其制未詳。明皇開元二十六年，天下州縣每鄉一學，仍擇師資令其教授。此始如後世村塾義館。卽一縣不知凡幾矣。宋仁宗命藩輔始得立學，史稱晏殊知應天府，延范仲淹以教生徒。自五代以來，天下學校廢，興學自殊始。洎仲淹在朝，建議慶歷間始許置縣學。云許置者爲私立學舍者言。因仁宗景祐之詔，非方郡不許置故也。祖無擇知袁州，史傳云自慶歷詔天下立學，十年間其弊徒文具，無命詔之實。無擇首建學官，置生徒，郡國弦誦之風由此始盛。龔鼎臣知漢州，請於朝廷廟學，選邑子爲生，立課肄法。人大勸，當時興學者可指數。是則州郡猶屬虛文，而況於縣耶？古者學與廟分，故郡縣有學者少，而縣或寄於州。但縣雖無學，未嘗無廟。唐太宗貞觀時，許敬宗等議縣學以令爲初獻，開元釋奠之制，屬縣用酒脯。在唐已稱廟。

爲學。宋仁宗時。王隨知通州。以州少學者。徙孔子廟。起學舍。州人遣子弟就學。謂之徙者。當是別擇寬廣之處。而學附於廟。於此可見。陳襄知河陽縣。進州子弟於學。王獵爲林慮令。俗不知學。獵立孔子廟。擇秀民誨之。是皆縣也。然觀神宗元豐時。諸路府州學官僅五十三員。卽郡之小者。學猶缺如。宗澤調龍游令。民未知學。澤爲建庠序。設師儒。此已是徽宗時。而縣之有學者。猶爲僅見。遼史獨稱大公鼎爲良鄉尹。建孔子廟。是廟猶始建。前此無學可知。金昌宗明昌五年。上問輔臣孔子廟諸處何如。平章政事守真曰。諸縣見請建立。元世祖至元時。命雲南諸路皆置學。以祀先聖。是立廟於學之明證。元史祭祀志。成宗卽位。詔諸路府州縣邑廟學書院。修完廟宇。自是天下郡邑廟學。無不完葺。釋奠悉如舊儀。宋元人每稱廟學。廟學之合。一其自宋始乎。明洪武二年。詔天下府州縣皆立學。由是人但知有儒學。無復有如唐之稱孔宣父廟。文宣王廟。宋之稱夫子廟者。大凡宋以



前稱廟有廟者不必有學。故雖有縣學亦廟公而學私。宋以後稱學弦誦之地。卽俎豆之地。學無不公。其私者乃別稱書院。書院之在宋元者卽是學官。至明則書院爲私置矣。至若金章宗謂僧徒修飾宇像甚嚴。道流次之。惟儒者於孔子廟最爲滅裂。守貞曰。儒者不能長居學校。非若僧道久處寺觀。上曰。僧道以佛老營利。故務在莊嚴。閎侈。起人施利自多。所以爲觀美也。嗚呼。此則古今同慨者矣。

### 名宦鄉賢祠

明宏治九年王雲鳳

字應舒。連州順人。成化甲辰進士。仕至巡撫宣府。

爲祠祭郎中。請天下府州縣

學校悉立名宦鄉賢祠。遂爲定制。見明史藝文傳。元始四年詔祀百辟卿士有益於民者。蜀郡以文翁九江以召父。臨應詔書。歲時郡二千石率官屬行禮。晉書陸雲爲浚儀令。去官。百姓追思。圖畫形像。配食縣社。此名宦之義也。傳曰。鄉先生沒。其人可祀於社者。謂之賢宗。此鄉賢之義也。鄉賢之附學官。起自北宋。宋史鄭俠卒。州縣

皆祀之於學。楊慈湖之門人錢時理宗寶祐間守臣季鏞祀於學。王  
圻續通考度宗咸淳中蘭溪金景文事親至孝知縣沈應龍以景文  
及陳天隱董少舒請立碑建祠於學宮之後名三賢堂文天祥白童  
子時見學宮所祀鄉先生歐陽修楊邦乂胡銓像皆謚忠卽欣然慕  
之然其時未嘗有鄉賢之名元仁宗時婺源建鄉賢祠祀朱文公其  
地不必在學宮而鄉賢之名當始於此矣名宦之附學宮起自南宋  
紹興中張運知桂陽監修庠序之教祀漢以來守令有功德於桂陽  
者衛颯唐羌等七人於學寧宗時許奕知遂寧府民德之畫像祀於  
學沿及元末順帝時游宏道爲化州通判海寇犯境戰死祀於文廟  
側是皆未嘗有名宦之名其祀或出於官或出於民皆本公論明制  
定自朝廷而或論非至公故續通考載直隸提學御史陳子員請郡  
邑學宮名宦鄉賢之秩祀皆當屬之提學官別衙門不得越俎允行  
明會典載萬歷二年令各府按釐正名宦鄉賢有不應入祀者卽行

革黜又如沈德符萬歷野獲編褚人獲堅瓠集各書所載成化中給事王徽以論宦官牛玉謫普安州判將卒屢戒其子欽佩曰鄉賢祠甚雜亂吾耻居其中切不可入論牛玉在成化時尚未立鄉賢祠其卒必在宏治或宏治後相時河南有司欲以其封翁入鄉賢劉謝曰吾郡鄉賢祠有二程夫子在吾父何敢並焉王劉之論其非後人所能及矣

### 四大書院

書院之建自唐元宗於麗正殿置修書院人稱麗正書院其後創集賢書院者二一在大明宮光順門外一在東都明福門外皆名在朝廷唐書職官志開元七年於麗正殿置修書使十三年與學士張說等宴於集仙殿因改名集賢院改修書使為集賢書院其大明宮所置書院本命修書院屋宇宏敞永泰九年三月詔僕射裴冕等書院詩此即宋四大書院之一也四大書院者何有謂徂徠金山岳麓石鼓者此范石湖石鼓山記之說也有謂天下四大書院二在北二在南在北者嵩陽睢陽在南者岳麓白鹿洞此吳草廬重建岳麓

書院記之說也。余按文獻通考所載四大書院，乃是白鹿洞、石鼓、應

天府、岳麓四處。論其創建之先後，則石鼓最在前。唐元和間，衡州秀水李寬

題詩者，朱子石鼓書院記作李寬。黃清老石鼓學田記仍作李寬。次白鹿洞。南唐升元中，白鹿洞建學館。以本道為洞主，掌其教授。次岳麓。宋太祖

郡守朱洞始創，字其又次應天府。真宗大中祥符二年，應天府民曹誠，即楚邱城同文書院。議則創自彭城劉整。

事。其名聞朝廷也。則白鹿洞為始。太宗太平興國二年，知江州周述，奏盧山白鹿洞。學徒常數千百人，乞賜九經，肄習。國子監給本。

仍傳。次應天府。大中祥符二年，賜額。次岳麓。大中祥符八年，召見山長周式，拜國子學。主簿使歸，教授詔賜書院名，增賜中秘書。次石鼓。

學田記云：宋景祐丙子，始賜額。蓋仁宗景祐三年也。通考序於真宗之前，誤矣。衡州府志云：至道二年，郡人李士真，即李寬舊址創書院。至景祐二年，劉沆守衡州，請於朝，始賜額。四書院

雖並稱，而賜額賜書，則歷太宗、真宗、仁宗三朝。先後六十年之事。馬

氏又言：西京嵩陽書院，賜額於至道二年。江寧府茅山書院，賜田

於天聖二年。嵩陽茅山後來無聞。獨四書院之名著。後來所在書

院尤多。而其田土之錫，教養之規，往往過於州縣學。蓋皆欲倣四書

院云。

山長書院生

古者三公在朝三老在學公與老皆無職於六官故學記注云古者仕焉而已者歸教於閭里尙書大傳云大夫爲父師士爲少師此大夫士皆仕焉而已者也南唐升元中白鹿洞建學館以本道爲洞主掌其教授其時稱洞主尙無山長之名五代蔣維東隱居衡岳從而受業者號山長見續山長以衡山名猶之洞主以鹿洞名耳宋大中祥符中嶽麓書院山長周式以行義著此則書院之山長也山長亦稱院長嵩陽書院王曾奏置院長是也又稱堂長李燭爲白鹿書院堂長湯漢充象山書院堂長是也亦稱山主台州守王華甫建上蔡書院言於朝乞楊棟爲山主是也宋州郡之學雖設教授但委於漕司熙寧中始命自朝廷其後乃有特命者史稱咸淳元年初命趙功郎鄧道爲韶州相江書院山長主祀先儒周敦頤是也有以教授兼者理宗本紀景定四年何其葵州教授兼麗澤書院山長徐璣建寧府教授兼建安書院山長是也元史世祖至元二十八年詔凡先儒

過化之地名賢經行之所與好事之家出錢粟贍學者並立爲書院其師儒之任獨有教授命自朝廷若所謂山長者則與學正學錄敎諭同爲命於禮部及行省與宣慰司者耳仁宗延祐二年丞相帖木迭兒合散等奏下等舉人有出身者於資品上優加之無出身者與山長學正後不爲例順帝至正三年監察御史成遵等言用終場下第舉人克學正山長會試不中者與下第舉人同山長至明初猶有之今乾隆三十一年正名院長與宋之嵩陽院長有相同者至如宋史云雷簡夫始自隱士起自號山長以山長爲隱士自號此元明所無也今書院所養選取郡縣佳士宋史尹穀傳云初潭士以居學肄業爲重州學生月試積分高等升湘西嶽麓書院生又積分高等升嶽麓精舍生潭人號爲三學生卽一書院而生有不同與今肄業者分內外課相彷彿矣

### 科舉

唐高宗永隆二年劉思立言明經多抄義條進士惟誦舊策皆亡實材有司以人數克第夫唐不糊名每有請托而試官銜文猶不至如宋史所云謬種流傳也宋選舉志寶元中李淑侍經筵上訪以進士詩賦策論先後淑言詩賦爲第一場論第二場策第三場帖經第四場然考官以所試分場不能通加評校首場不取輒退落士之中否殆繫於幸不幸願敕有司併四場通校工拙毋以一場得失爲去留蓋科舉之弊習自古而然矣唐舒元興上書言今之命賦律詩皆是偷折經誥侮聖人之言者乃知非聖人之徒也宋神宗時蘇軾上書言近世士人纂類經史綴輯時務謂之策括待問條目搜抉畧盡臨時竄易以眩有司有司莫能辨也蓋士習之陋亦自古而然矣但策括猶知有經史也薛昂爲大司成士子有用史記西漢語輒黜之哲宗時嘗請罷史學哲宗斥其俗佞昂主王氏學後又依附蔡京至舉家爲京諱昂嘗誤及卽自批其口嗚呼夫非元豐進士哉

貢院防閑

彌封 磨錄 硃墨卷 內外

試士嚴於防閑與夫彌封磨錄等事習見而莫詳所自唐舒元輿論貢士書云待命有司始見貢院懸版樣立束縛檢約之目勘磨狀書劇責與吏胥等倫臣幸狀書備不被駁放得引到尙書試試之日見八百人盡手攜脂燭水炭泊朝晡餐器或荷於肩或提於席爲吏胥縱慢聲大呼其名氏試者突入棘圍重重乃分坐廡下寒餘雪飛單席在地謂唐虞三代無此慢易且欲於廊廡之下特設茵榻安得茵榻許多耶能改齋漫錄以爲唐制本如此耳顧肅宗乾元初中書舍人李揆請試進士於庭中設五經諸史及切韻本於牀曰大國選士但務得材經籍在茲請資尋檢白居易奏狀亦云許用書策而以長慶時書策不容一字爲非此專指覆試而言蓋卽覆試猶許之國史補云挾藏入試謂之書策是唐無懷挾之禁矣唐制試日許燒燭二條晉長興二年改令晝試寶貞固請復給燭周廣順中寶儀又奏用



書是終唐之世。總許見燭矣。唐惟詔舉糊名。宋選舉志。淳化三年。蘇易簡知貢舉。受詔卽赴貢院。仍糊名考校。遂爲例。景德四年。定親試進士條例。試卷付編排官。去其卷首鄉貫狀。別以字號第之。付封彌官。謄寫校勘。用御書院印。付考官定第畢。復封彌。送覆考官再定等。編排官閱其同異。未同者再考之。八年。始置謄錄院。官封試卷付之。集書吏錄本。宋之謄寫。卽封彌官。其後置院。乃分二事。封彌凡再者。因送覆考。而封其考官所定之第也。志又言。舉人之弊。凡五。曰傳義。曰換卷。曰易號。曰卷子出外。曰謄錄滅裂。寶慶二年。左諫議大夫朱端常奏防戢之策。端平元年。侍御史李鳴復等。請嚴懷挾之禁。懸賞募人告捉。時皆允行。金史移刺履傳。初舉進士。惡搜檢煩瑣。去之。其後履已進。禮部尙書兼翰林直學士。乃追賜大定三年。孟宗獻榜下進士及第。是年拜參知政事。選舉志云。試院有彌封。并謄錄官。搜檢懷挾官。泰和元年。省臣奏。搜檢之際。雖當嚴切。然至於解髮袒衣。索

及耳鼻則過甚矣。豈待士之禮哉。故大定二十九年已嘗依前故事。使就沐浴。官置衣爲之易之。既可防濫。且不虧禮。上從其說。命行之。三年上以彌封官泄語於舉人。勅自今女直司則用右選漢人封。漢人司則以女直司封。章宗泰和上距世宗大定三十餘年。其稱二十年者。蓋總世宗在位之數。自章宗明昌元年至永安五年。十年之間。遂收世宗定制。省臣所以有此奏也。元選舉志。舉人各自備三場文卷。并草卷各一十二幅。於卷首書三代籍貫年命。前期半月於印卷所投納。用印鈐縫。各還舉人。又云。舉人就試無故不冠及擅移坐次者。有偶與親姻隣坐而不自陳者。懷挾代筆傳義者。並扶出。又云。日未出入場。黃昏納卷。受卷送彌封所用印訖。寫三不成字爲號。每名累場同用一號。送謄錄所。並用朱書謄錄。送對讀所。以元卷與朱卷對讀無差。呈解貢院。考校用墨筆批點畢。取元卷對號開折。分爲二榜。揭於省門之左右。進士二榜用敕黃紙書。揭於內前紅門之左。

右凡此制度蓋自宋元已詳並非始自前明惟彌封舊稱封彌元之朱卷明改硃卷或因避國姓改耳若所云草卷與今殿試同所云二榜亦稱左右榜一是蒙古人及色目人一是漢人與南人與今不同明選舉志鄉試會試供給收掌試卷彌封謄錄對讀受卷及巡綽監門搜檢懷挾俱有定員各執其事又云試日入場講問代冒者有禁晚未納卷給燭二枝彌封編號作三合字考試者用墨謂之墨卷謄錄用硃謂之硃卷在外提調監試等謂之外簾官在內主考同考謂之內簾官簾內簾外亦自元有此名而明謂之內簾外簾耳又云其賄買鑽營懷挾債代割卷傳遞頂名冒籍弊端百出而關節爲甚按關節之名起於唐國史補云造請權要謂之關節此與明史所指關節不同明之關節則如宋史劉師道弟幾道將廷試近制悉糊名較等陳堯咨當爲考官教幾道於卷中密爲識號幾道既擢第事泄詔落其籍堯咨免官又如趙潛養痾漫筆所載汪玉山語其友以易義

冒子中用三古字及蘇叔黨持授李方叔以楊雄優於劉向論題及後中選者皆誤中他人然皆事由考官非士子之鑽營求謀也若宋史王欽若傳任懿以賂登科曾爲關說而客與妻孥共爲之後乃以誣知舉官洪湛冤死貶所士風之壞於斯極矣至於科場之例有不合式而貼出者考金完顏匡章宗時試詩賦漏寫詩題下注字不取特賜及第元選舉志有試卷不考格犯御名廟諱及文理紕繆塗注乙五十字以上者不考所云不取不考卽貼出也

經義 繙譯科目

今人稱八股文曰帖括曰時文皆非也唐制取士不外進士明經兩科進士科用詩賦明經科用帖括亦曰帖由所謂帖括帖由者乃是以所習經書掩其兩端中間惟開一行裁紙爲帖凡帖三字隨時增損可否不一令應試者或舉全文或述注疏

宋呂氏家塾有呂許公應本州縣鄉舉試卷刊本如云作者七人矣

請以七人一名對其對者則曰七人某某對又云見有禮於其君者如孝子之養父母也請以下文對其對者則曰見無禮於其君者如廢鵲之逐鳥雀也雖對或舉經文而云請以注疏對其對者則曰

注疏云云謹對不能對者則曰對未審

或得四或得五或得六爲通至有帖孤章絕言疑似

參互者以惑之既帖書墨義又口試經問大義十條謂之口義但若

兒童挑句背誦者然此之謂帖此之謂括白氏六帖取此義也通六乃數多者

故云六帖開元十七年國子祭酒楊場上言主司帖試明經不務求述作

大旨專取難知問以孤經絕句或年月日請自今並帖平文從之宋

初取士尙沿唐制英宗治平三年詔禮部三歲一貢舉至神宗熙寧

四年王安石欲行其新說乃詔盡罷諸科令士各占去聲治詩書易周

禮禮記一經兼以論語孟子變聲律爲議論變墨義爲大義是曰經

義其式先列注疏次引先儒異說末乃斷以己意猶是論體宋文鑑

有張庭堅經義二篇皆書經題一惟幾惟康其弼直一自靖人自獻

于先生全是論體必其前有引注疏及先儒之說呂氏削而不錄也

元則設疑爲問有四書疑本經疑是又近於策問明史選舉志云專

取四子書及易書詩春秋禮記五經命題試士蓋太祖與劉基所定

其文畧仿宋經義。然代古人語氣爲之。體用排偶。謂之八股。通謂之經義。此較宋之經義已極不同。而況唐之帖括乎。

或曰。明初有疑有義。今成化中始有八股。

人若以帖括者。體帖其詞氣。而穩括其義理。故云尔。豈非臆度不根之說乎。歐陽公曰。天聖間。予舉進士於有司。見時學者。務以言語聲偶摘裂。號爲時文。則時文乃指進士之詩賦而言。其後理宗時。唐璘疏中。所謂宰相用時文之才。爲經世之具。指此也。豈謂帖括哉。今人不明其制。乃以詩賦爲古文。經義爲時文。誤矣。場屋文之尙對偶。不待八股而然。宋選舉志。徽宗大觀中。臣僚言。場屋之文。專尙偶麗。題雖無兩義。必欲釐而爲二。以就對偶。其超詣理趣者。反指以爲淡泊。請擇考官戒飭之。以救文體。然則經義之變爲八股。蓋亦以漸而致也。今人試帖之選。以詩爲帖。似屬未當。或又誤以試帖猶云試卷。遂并經義亦稱試帖。其與誤稱帖括等耳。金之取士。其試詞賦經義策論中選者。謂之進士。律科經義中選者。曰舉人。而策論進士。又別爲

一科選舉志云策論進士選女直人之科也世宗頒行女直大小字欲興女直字學校擇良家子爲學生大定九年選諸路異等者薦京師教以詩策十三年就憫忠寺試得徒單鑑等二十七人十六年定制以策詩試三場策用女直大字詩用小字以八月二十五日府試

上曰契丹文字年遠

遷史太祖神冊五年始製契丹大字

觀其所撰詩義理深微當時何不

立契丹進士科舉今立女直字科恐女直字創制日近義理未如漢字深奧恐爲後人議論丞相守道以爲行之久亦可同漢人文章乃命譯作程文俾漢官覽之所譯程文但詩策耳二十八年添試經論其試期鄉試以八月會試以正月御試以三月皆以二十日又間三日作兩試此在詞賦經義兩進士科之外者世宗嘗謂宰臣曰女直進士中才傑之士蓋亦難得如徒單鑑夾谷衡尼龐古鑑皆有用材也見夾谷衡傳按以國語爲詩甚奇遼穆宗第五子勗本名烏野能以契丹字爲詩文凡游宴有可言者輒作詩以見意此金女直字科

用詩之所由來也。元世祖至元八年，詔天下置蒙古字學，俟習學成效，出題試問。所對精通者，量授官職，而無舉人進士之名。其於鄉試、都省試，雖有蒙古色目人試經問及策，漢人南人試明經經疑古賦詔誥章表內科及策之不同，未嘗用蒙古字。但榜分左右，故御試賜及第出身者，必並書首二人也。國初順治八年，辟定制，滿洲、蒙古、烏金超哈、漢試經義三篇，俱清書與漢合榜。至九年，始放進士十五人，狀元麻勒吉授宏文院修撰。後改名馬中驥此制後不復行。凡鄉會試之文，滿漢無異。至雍正間，始更設翻譯舉人進士，蓋兼備金元之制，而加盛焉。翻譯無殿試，故無狀元。

### 朱子同年錄

朱子有同年錄，在杭州孤山朱子祠內。所載高宗紹興十八年戊辰四月十七日集賢殿唱名知貢舉官邊知白、同知貢舉官周執羔、參詳官鄭鬲等檢點試卷官張頴等一命十人、狀元王佐、二命甘焯等



十九人三命索揚等三十七人四命孟致誠等一百二十二人五命  
戴幾先等一百四十二人凡三百三十人特奏名俞舜凱一人朱子  
係五命第九十名錄云字元晦小名沈郎小字季延年十九歲史稱年十八貢  
於鄉乃外祝氏偏侍下第五一兄弟無一舉娶劉氏曾祖徇祖森承事  
郎父松承議郎本貫建州建陽縣羣玉鄉三桂里父爲戶當時小名  
小字皆載有年五十餘者亦載小字而面貌則無若特奏名者乃貢  
於禮部而數被詘之人自太祖開寶三年詔貢士十五舉嘗終場者  
一百六人賜本科出身後遂有特奏名之例俗謂特奏名爲老榜獨  
醒雜志載董德元登第詩云故鄉若問登科事便是當初老榜官是  
也又朱子亦字仲晦落職後結草堂於建陽隱峯之雲谷扁以晦菴  
亦號雪谷老人又創竹林精舍更號滄洲病叟最後筮得遯之同人  
更號遯翁朱子之外祖諱確乃歙人至其孫康國始從朱子居崇安  
曾孫穆嘗學於朱子卽著方輿勝覽者也寧宗嘉定十年十二月賜

朱子謚曰文。理宗寶慶三年正月。特贈太師。追封信國公。改徽國。理宗淳祐元年正月。從祀孔廟。元順帝至正二十二年。加封齊國公。又追謚朱子父曰獻靖。有兩制詞。載元史祭祀志。朱子壽七十一。蓋生於高宗建炎四年九月十五日。卒於寧宗慶元六年三月。命子生於尤溪。葬於大林谷。明景帝景泰六年六月。以朱子九世孫挺居福建建安者。爲翰林院世襲五經博士。世宗嘉靖二年四月。又以御史言。以朱子十一世孫墅居婺源者。爲五經博士。三十八年。令其世襲。

科目記

狀務舉科

五經中式

副榜

今鄉試會試俱進呈錄。蓋起於唐宣宗時。裴庭裕東觀奏記云。上雅尚文學。尤重科名。大中十年。鄭顥知舉。後宣宗索科名記。顥表曰。自武德以後。便有進士諸科。出鸞谷而飛鳴。聲華雖茂。經鳳池而閱視史策。不書所傳。前代姓名。皆是私家記錄。虔承聖旨。敢不討論。臣尋委當行祠部員外趙璘。採訪諸家科目記。撰成十三卷。自武德元

年至朝謹專上進方俟無疆勅宜付翰林自放榜後並寫及第人姓

名及所試詩賦題目進入內仍仰所司逐年編次但其書無一流傳

故新舊唐書皆無可錄宋史則載有姚康唐登科記李奕唐登科記

唐顯慶登科記蔡允翰唐制舉科目圖洪适五代登科記适又撰大

宋登科記倣姚康錄制舉詞科不專述進士一科洪邁有皇族登科

題名又徐鉉樂史史演俱有登科記江都李椿有中興登科小錄是

皆私家之著作而今亦未聞有傳者明嘉靖十四年帝親製策問手

自批閱擢韓應龍第一降諭一命三人及二命第一名次前後之由

禮部因以聖諭列登科錄之首崇正七年知貢舉林鈺言舉人顏茂

猷文兼五經作二十三藝茂猷先以天啟命于作五經題勝錄官嫌其違制止膝四書義

見下帝許送內簾茂猷中副榜會試有副榜至我朝乃革之特賜進士以其名另為一

行刻於試錄第一名之前五經中式者自此接踵宋取士以經義有稱五經

則皆九經及第今之五經中式者自乾隆初年以前猶有之凡此皆試錄之見於史者黃佐翰林記云洪武命于鄉試

乙丑會試初為小錄惟刻重事

之官。試士之題及中選者等第。籍貫經籍而已。次科。或辰始刻士子之文以爲程式。自是遂爲定式。一按以第一人爲狀元。唐宋皆然。宋史馬涓入幕府。自稱狀元。呂大忠謂曰。狀元云者。及第未除官之稱也。既爲判官。則不可。撫言謂唐曲江賜宴。以年少者爲探花郎。戴埴鼠璞謂本非貴重之稱。今以稱鼎魁。不知何義。又引東軒筆錄。謂選年少三人爲探花使賦詩。恐因此訛爲第三人。是一二三之名稱。亦始於宋。但宋之一命。或多至十人。若其一命。賜及第者只三人。謂之狀元。榜眼。探花。乃明制也。副榜者。元志科目。附百官志。後順帝至正八年。中書省奏准監學生員。每歲取及分生員四十人。三年應貢會試者。凡一百二十八人。除例取十八人外。今後再取副榜二十人。時謂之鄉試。備榜。副榜之名。當起於此。而明及國初會試亦有之。又與今不同也。宋以第二人及第者爲榜眼。見陳著拙傳。

### 南北中卷

文武五考

唐重進士。明經。武宗會昌五年。定舉士人等所送人數。其國子監明

經每年送二百人進士三十人其隸名明經亦送二百人其宗正寺進士送二十人其東監同華河中進士不得過三十人明經不得過五十人其鳳翔山南西道東道荆南鄂岳湖南鄭滑浙西浙東鄜坊宣商涇邠江南江西淮南西川東川陝虢等道進士毋過一十五人明經毋過二十人其河東陳許汴徐泗易定齊德魏博澤潞幽孟靈夏滑青鄆曹兗海鎮冀麟勝等道進士毋過十人明經毋過十五人金汝鹽豐福建黔府桂府嶺南安南邕容等道進士毋過七人明經毋過十人人以地分多寡自唐已然矣宋沿唐制太宗朝所得率江南之秀其後又別立分數考校五路舉子以北人拙於詞令故優取五路謂京東京西陝西河北河東也司馬溫公請貢院逐路取人歐陽公蘇東坡皆意在覈實而不必有所假借蓋皆不欲改變舊制也至明洪熙時科舉取士分南士北士見於日知錄之引明實錄其載在明史者宣德正統間會試分南北中卷南則應天及蘇松諸府浙

江江西福建湖廣廣東北則順天山東山西河南陝西中則四川廣西雲南貴州及鳳陽廬州二府滁徐和三州是卽一南直隸而有南與中之異至武闈亦倣文闈南北卷例分邊方腹裡邊六腹四此俱行之於會試耳今會試已分省而南北中卷乃行之順天鄉試南與中皆指外省言北則直隸之貢監合北五省皆增其額於順天本省正額之外者也。南時文武有互考之例亦多有中試者蓋在唐時文吏或求武選武夫或求文選惟選官有互用耳宋則武舉人多求試換文資而太學諸生久不第者多去從武舉是互考亦自宋開其端矣。

童子科 童生

漢自蕭何草律曰太史試學童能諷書九千字以上乃得爲史後漢之法年幼才俊者拜童子郎若黃琬臧洪司馬朗皆拜爲郎而任延張堪俱號聖童杜安號奇童黃香號黃童其尤異也。

前漢終軍漢書云世謂之奇童考軍爲博士弟

十八矣。後魏有謝廉趙建章並爲郎。唐設童子科。劉晏最著。韓文公贈

張童子序。其自九年陞於禮部。又二年拜衛兵曹。十一歲耳。唐制。凡

十歲以下。能通一經。及孝經論語。每卷誦文十通者。予官。通七者。與

出身。代宗廣德間。至文宗開成間。再停。再復。後唐時。王恕童子及第。

見宋史王濟傳。宋亦設童子科。楊億晏殊姜蓋蔡伯倫俱嘗以神童

召試。本紀所載。秦州童子譚孺卿。賜本科出身。饒州童子朱天錫。朱

天申。先後賜五經出身。列傳中。楊正臣舉童子。賜出身。胡穎中童子

科。皆是也。神宗元豐四年。置在京小學。有就傳。初筮兩齋。政和之制。

限年。自八歲至十二歲。惟曹芬以文優。賜同上舍出身。餘無所聞。其

皆小時了了。大未必佳耶。高宗一朝。童子求試者三十六人。惟萬頃

彭興宗張探朱虎臣劉轂五人授官。而虎臣轂皆以武著。孝宗一朝。

童子求試者七十四人。而命官者惟呂嗣興王克勤李如圭林公洽。

何擢何致遠郭洵七人。其最奇者。孝宗淳熙元年。女童林幼玉求試。

中書後省挑試所誦經書四十三件並通詔特封孺人惜未詳其年  
歲而後亦無所表見光宗時童子補官者本紀惟載吳綱一人度宗  
時李伯玉請罷童子科謂非所以成人材厚風俗詔自咸淳三年爲  
始罷之金史大定二十九年章宗卽位初設經童科經童之制凡士  
庶子年十三以下所貴在幼而誦多者若年同則以誦大經多者爲  
最前此太宗時有東平劉天驥年七歲至章宗時有益都劉住兒十  
一歲又文藝傳麻九疇七歲能草書作大字數尺者章宗召見明昌  
以來稱神童者五人太原常添壽四歲能作詩程權傳頗好論醫常添壽方數  
歲權召之因書醫非細事四字  
添壽字以爲中其病云劉滋劉微張漢臣後皆無稱獨九疇能自樹立賜  
進士第遷應奉翰林文字但金之經童科熙宗時取及五十人海陵  
時停罷章宗復立是科放及百數見於守貞傳中非止此數人也又  
佞幸傳胥持國經童出身官尙書右丞四方有經童入相之語其人  
可知矣元史所載自成宗大德三年至文宗至順二年所舉凡十五



人惟張秦山尤精篆籀陳元麟能通性理葉留耕問以四書大義則

對曰事父母能竭其力事君能致其身時人以遠大期之夫古者強

而仕觀左傳國語所載曰童子何知焉曰童子言焉曰使童子備官

而未之聞耶曰猶有童心初不以童子為貴也項橐七歲而為孔子

師此甘羅之語本屬無稽董仲舒對策有云達巷黨人不學而自知

孟康注云人項橐也隸釋載逢盛碑以為后橐考論語何氏集注無

有此說史記載秦之甘羅年十二為上卿而自使趙以後不聞別有

建樹其視黃香劉晏遠不及矣古之童子郎最大者不過十四五

藏洪十五宋之嬰殊十四楊而小只有三四歲者宋真宗時閩人蔡伯倫三歲舉神童仕

年考宗朝衢州已割童子之科唐宋亦屢舉屢廢明選舉志士子未入學

者通謂之童生當大比之年間收一二異敏三場並通者俾與諸生

一體入場謂之充場儒士中式即為舉人不中式仍候提學官歲試

合格乃准入學此例後亦不行士之頭顱老大而猶困童試者何地

蔑有哉。

武狀元

武舉

武學生

漢選六郡良家子以材力給羽林期門此武夫應選之始六郡者隴

西天水安定北地上郡西河也唐武后長安二年

即中宗廟號

始置武舉

中第者兵部選用宋有武舉武選仁宗天聖八年親試武舉十二人

先閱其騎射而後試之此已爲後世武殿試之發端而無武舉及第

出身之名慶歷八年罷武舉英宗治平元年復之神宗熙寧三年親

策武舉凡閱三十餘年又一行之五年樞密請建武學於武成王廟

選文武官知兵者爲教授生員以百人爲率此武有生員之始也八

年立武舉絕倫法詔武舉與文舉同時鎖試元豐元年詔内外文武

官各舉堪應武舉一人二年三月試之嗣是每三年一行徽宗崇寧

四年罷諸州武學南京則自高宗紹興十六年始建武學令武學生

習七書學置博士一員以文臣有出身及武舉高選人爲之學諭一

員以武舉補官人爲之。孝宗乾道五年，廷試武舉，榜首賜武舉及第。餘賜武舉出身。淳熙四年，以文科狀元例除館職，亦召武舉榜首爲閣門舍人。慶元五年，定解額以後，稱武舉進士，武無狀元之名也。高宗時，浮梁朱虎臣以童子求試，能排陣步射，及誦七書，補承信郎。既召見，特又賜金帶寵之，但授官耳。而今饒州府志稱虎臣年九歲，紹興間武殿試十二矢中九的，賜金帶武狀元。宋試童子，皆天子親試，而無殿試之名，其稱狀元，特志乘語耳。金熙宗皇統時，設武舉，有上中下三等試箭，及以槍持刺木偶人方板，又問律，并孫吳書，凡不知書者，上等爲中，中爲下。章宗泰和時，初定武舉格，而不詳何格。宣宗時，同進士例，賜勅命章服。武舉入仕，授巡尉、軍轄。金志云：武舉上命第一名，遷忠勇校尉；第二、第三，遷忠翊校尉，獨優於前列三人。隱然鼎命，特無其名耳。明自洪武二十年立武學，用武舉武臣子弟於各直省應試。成化十四年，定武科鄉會試，悉視文科例。

此據明史選舉志按日知錄引明實錄云成化

中太監汪直請武舉設科。鄉試會試數試。悉如  
進士。恩例。行明史所載。思得考之未詳。

宏治六年。定武舉六歲一行。先策畧。

後弓馬。策不中者。不許騎射。十七年。改定三年一試。出榜賜宴。正德  
十四年。始定初場試馬上箭。二場試步下箭。三場試策一道。嘉靖初  
定於十月考試。次年四月會試。未聞復有殿試也。崇正四年。武會試  
命詞臣方逢年。倪元璐再試。逢年等奏請殿試傳臚。如文例。乃賜王  
來聘等。及第出身有差。王來聘京師人。武榜有狀元。自來聘始。卽授  
副總兵。明年。攻孔有德於登州。中傷而死。至武學之設。雖起於宋。興  
廢不常。明洪武時。建自大寧等衛。正統中。建於兩京。尋命都司衛所  
應襲子弟。提學官選送武學讀書。無武學者。送衛學。或附近儒學。此  
已併武學於儒學矣。成化中。敕所司歲終考試入學武生。當時武學  
蓋另爲一學。崇正十年。令天下府州縣學。皆設武學生員。提學官一  
體考試。雖名武學生。實隸儒學。而武學之廢。其時不可考矣。按唐之  
武舉。如郭汾陽。自武舉異等中出。而功蓋天下。誠爲天所篤生。他如

員半千對策論天地人三陣卓然名言宋史忠義傳有武學生華岳

史未詳何人

字子西嘗上書劾韓侂胄

其上書謂朝廷不宜用兵志欲遷韓見本紀

下大理配建寧獄侂

胄誅放還入學登第爲殿前司官屬又謀去史彌遠事覺下臨安獄杖死東市武學有人亦何忝於陳東也哉

### 象學數學

先天圖太極圖河圖洛書皆傳自陳搏宋史隱逸陳搏傳云搏善易以數學授穆修修授李之才之才授邵雍以象學授種放放授許堅堅授范諤昌至朱震漢上易解敘其源流尤詳儒林傳載其進易說表云陳搏以先天圖傳種放

據此則數學象學俱於放而放以數學授修與隱逸傳異

放傳穆修修傳李

之才之才傳邵雍放以河圖洛書傳李溉溉傳許堅堅傳范諤昌諤昌傳劉牧穆修以太極圖傳周惇頤惇頤傳程顥程頤是時張載講學于二程邵雍之間故雍著皇極經世書收陳天地五十有五之數惇頤作通書程頤作易傳載造太和參兩篇史稱震論圖書授受源

斐如此。蓋莫知其所自云。朱子語類云。先天圖不起于康節。希夷以前元有次第。是方士輩相傳授。參同契中意亦相似。惟劉牧以九爲河圖。十爲洛書。與諸儒舊說不合。又荅袁樞曰。以河圖洛書爲不足信。自歐陽公以來已有此說。然終無奈顧命繫詞論語皆有是言。而諸儒所傳二圖之數。雖有交互而無乖戾。不可得而破除也。然則朱子於圖九書十之說。雖嘗辨之。未嘗不心疑之。竊謂河洛先天太極

周子太極圖本陳搏無極圖極自下而上太極口上而上面圖則一也朱子按有大極圖授受考載集中

誠與易道相發明。然於周易象

爻之詞要難牽合。程子易傳其言精微詳盡。而初未嘗及周邵之說。不解漢上易說表。何以必牽併爲一也。又按堯峯文集有跋先天圖文云。堯夫嘗以其學授王豫。豫死葬其書家中。及吳曦叛盜發豫冢。得皇極經世體要一篇。內外觀象數十篇。有道士杜可大賄盜取之。以授盱江廖應淮。廖死鄱陽傅立得之。傅後再傳至德興董時。又無聞焉。金華宋太史作溟洋生贊。所序廖事尤奇。

文繁不錄

廖乃宋末元初

時人

朱學源流

朱子父韋齋先生病亟時戒朱子往從其友籍溪胡原仲字白水劉

致中勉之屏山劉彥冲字子翬三人受學焉胡劉皆載宋史隱逸傳白水既

爲韋齋身後經理其家而誨朱子如子姪史稱朱子之得道自勉之

始朱子自謂從三君子遊而事籍溪先生爲久屏山則朱子自少以

家貧依父友劉子羽字彥修屏

山之兄也朱子請益于屏山告以易之不遠復三言俾佩之終身又

延平李愿中字侗與韋齋先生爲同門友雅重之遣朱子從學及後朱

子歸自同安不遠數百里徒步往從之而期以任重致遠延平嘗學

於南劍羅仲素字彥羅學於將樂楊龜山字時立楊則程門四先生謝良佐

及楊之一也朱子集周程張邵之大成其門弟子可考者約五十人

黃幹字直卿閩縣人朱子以其子妻之李燾字敬子南康建州人與黃勉齋並稱曰黃李張洽字元德臨江之清江人朱子謂黃

君者不  
陳淳字安卿漳人黃灝字商伯南人以上皆見於道學傳者其散見於儒

林及各列傳則如蔡元定字季通建陽人朱子稱爲老友四方來學者必俾先從質正蔡沈字仲默范愈德

朱子疾革手書屬其子存及門人范與黃幹以勉學及修正遺書爲言輔廣字漢卿居秀州之崇德鄉見董槐傳廖德明字子晦楊與立字

懋人葉味道初名賀孫以字行曹彥約字簡甫都昌人傅伯成字景初史部員外郎包楊包約

包遜建昌人徐僑字崇甫婺州義烏人楚蕃字昌父鄱州人年五十學於朱子詹體仁字元善任希夷字伯起

家於武王阮字南卿王介字元石劉燭字明伯建陽人劉字伯明陳定字師復丞相俊卿之子

幹李方子見朱子才傳陳孔碩福州侯官人陳文蔚講學鉛山徐元未往師之王

師愈金華人王栢之王瀚師愈子杜燁字知仁黃巖人見杜範傳此皆見之宋史者更有劉

子寰字圻父建陽人林用中字擇之古田人劉炎字潛夫方士繇字伯謫章康字季惠劉進字叔通

程先字傳之休寧人程永泰字次卿孫應時字季和晏淵字亞夫李伯謙字敬長傳誠字

叔仙人楊方字直長歐陽謙之字希通周端朝字子法祝穆字和父祝舉和父黃

營字子樵山章雪崖字平江皆登朱子之門者他若彭龜年劉珙曾季狸

吳獵舒璘程端蒙董銖則雖無師弟之名而所嘗講習討論者也黃



師雍吳昌裔何基董槐牟子才徐元杰陽枋陽岳又朱子門人之徒也薛叔似王埜李道傳魏了翁王栢則未及登朱子之門而私淑者也而其見於朱子全書者尙未得備述焉

### 道學之名

道學在宋乃小人設爲此名以傾害君子者尤袤傳云袤少從喻樗汪應辰游樗學於楊時程頤高弟也方軌道純熙間程氏學稍震忌之者目爲道學將攻之袤在掖垣首言道學者堯舜所以帝禹湯武所以王周公孔孟所以設教近立此名詆訾士君子故凡所謂廉介恬退踐履名節皆目之爲道學此名一立賢人君子一舉足且入其中俱無得免豈盛世所宜有孝宗曰待付出戒敕之袤死數年侂冑擅國於是禁錮道學識者以袤爲知言光宗紹熙元年劉光祖言道學非程氏私言乞定是非別邪正從之至於寧宗一時攻道學者鄭丙言近世士大夫有所謂道學者欺世盜名不宜信用陳賈言伏見

近世道學其說以謹獨爲能以踐履爲高以正心誠意克己復禮爲事此皆學者所共學也而其徒乃謂已獨能之夷考其所爲又大不然不幾於假其名以濟其僞耶乞擯斥勿用姚愈論道學權臣結爲死黨窺伺神器命草詔諭天下張巖張金陳自强程松等皆請嚴道學之禁是皆阿附佞冑之人而亦有深惡朱子者林栗爲兵部侍郎朱子爲兵部郎官未就職栗與朱子相見論易西銘不合栗遷吏部趣之朱子以脚疾請告栗遂論朱某本無學術徒竊張載程頤之緒餘爲浮誕宗主謂之道學妄自推尊所至輒攜門生十數人習爲春秋戰國之態妄希孔孟歷聘之風繩以治世之法則亂人之首也望停罷以爲事君無禮者之戒太常博士葉適辨之曰考栗之詞始末參驗無一實者其中謂之道學一語無實最甚自昔小人殘害良善率有指名或以爲好名或以爲立異或以爲植黨近忽荆爲道學之目鄭丙唱之陳賈和之居要路者密相付受見士大夫有稍務潔修

粗能操守。輒以道學之名歸之。以爲大罪。善良受害。無所不有。及後  
適遷知泉州。召入對。有欲人臣息心。既往圖報。方來之語。時侂冑亦  
悔。適奏及之。自是禁網漸解。觀此數條。則道學之名。乃正出於小人  
之口。是以朱子上。季宗封事云。一有剛毅正直。守道循理之士。出乎  
其間。則羣議衆排。指爲道學。十數年來。以此二字。禁錮天下之賢人  
君子。復如昔時。所謂元祐學術者。必使無所容其身而後已。此豈治  
世之事哉。其言畧同。尤疏宋史立道學傳於儒林之前。其識學殆與  
魏書立釋老傳等耳。獨不解李願傳中。稱程子祭願之文。有曰。自予  
兄弟。倡明道學。能使學者視倣而信從者。願與劉絢有焉。程子時。不  
應有道學之說。恐是傳寫訛誤。而劉光祖謂非程氏私言。蓋有由也。

### 慶元僞學之禁

慶元僞學之禁。凡五十九人。宰執四人。趙汝愚爲首。待制以上十三  
人。朱子爲首。餘官三十一人。劉光祖爲首。又武臣三。人。士人八。人。其

名則中興編年詳載之。宋史謂韓侂胄以趙汝愚之門及朱子之徒多知名士，不便於已，欲盡去之，謂不可一一誣以罪，則設爲僞學之名，以擯之用。何澹、劉德秀爲言官，專擊僞學。又胡紘等傳論曰：僞學之目，識者以爲京鏜實發之，蓋爲鏜薦引劉德秀爲諫官，首論留正引僞學之罪。史謂僞學之稱自此始。其時侂胄命之草詔者，則高文虎也。劉宰傳云：時詔仕者非僞學不讀，周惇頤、程頤等書，才得考試。

紹興三年，鄞城市井有取程頤語錄語，雜以微要，盛行於市。朝廷知而禁之，後三年僞學之禍乃作。見文獻通考。

其與朱子爲難者，不獨一侂

胄。王淮爲相，除朱子浙東提舉，台守唐仲友與淮同里，爲姻家。朱子行部至台，訟仲友者紛然，按得其實。前後章六上，淮乃擢陳賈監察御史，與尙書鄭丙、叶力攻道學。史言其後慶元僞學之禁始於此。遂昌人胡紘未達時，嘗謁朱子於建安。朱子待學子，惟脫粟飯，遇紘不能異也。紘不悅，語人曰：此非人情。隻雞尊酒，山中未爲乏也。遂亡去。及朱子爲待講，疏論韓侂胄之姦，侂胄恨之，使優人王喜於上前，戕

寇闕袖效朱子進趣戲於上前朱子遂去而意猶未快擢絃監察御史絃劾趙汝愚且詆其引用朱子爲僞學罪首在太常請禁僞學謂僞學猖獗圖爲不軌引唐五王不殺武三思爲說詔僞學之黨權住進擬用絃言也前御史劉三傑論趙汝愚劉光祖徐誼之徒前日爲僞黨至此又變而爲逆黨三傑又與沈繼祖連疏詆朱子又有選人余嘉上書乞斬朱子絕僞學見謝深甫傳至道學傳又作余嘉考嘉生平見於史者兩事一乞斬朱子一請加韓侂胄九錫小人無忌憚至此極矣及朱子旣沒將葬言者謂四方僞徒期會送僞師之葬會聚之間非妄談時人短長則謬議時政得失望令守臣約束從之于是門生故舊無送葬者獨辛棄疾爲文往哭之曰所不朽者垂萬世名孰謂公死凜凜猶生其先朱子予祠時湯璫上疏言某以正學爲講官宜追還仍授講職言皆侃侃如也其攻僞學而非專攻朱子者何澹爲中司論專門之學流而爲僞願風厲學者不得自相標榜王沆獻言令省部籍記

僞學姓名姚愈請降詔嚴僞學之禁施康年陳讜鄧友龍林采皆以  
攻僞學久居言路湯碩攻吳柔勝主朱某之學不可爲師儒官僞黨  
之禍本始京鎧卽京鎧佐  
南傳作鎧逮鎧死佐胃亦稍厭前事張孝伯以爲不弛  
黨禁恐後不免報復之禍佐胃以爲然追復汝愚朱子職名留正周  
必大徐誼等皆先後復官僞黨之禁寢解然當時如柴中行授撫州  
軍事推官轉運使移檄令自言非僞學中行奮筆曰如以爲僞不願  
考校孫逢吉章穎布衣呂祖泰皆嘗辨正學非僞而不可禁又如劉  
光祖撰涪州學記謂學之大者明聖人之道以修其身而世方以道  
爲僞諫官張釜指爲謗訕比之楊惲史論謂其盛名與學記並傳穹  
壤至於劉燾爲國子司業言於丞相史彌遠乞罷僞學之詔則又在  
後矣